



KENYATAAN AKHBAR KETUA PENGARAH KESIHATAN MALAYSIA

TEMPAT MAKAN SEBAGAI TEMPAT DILARANG MEROKOK

Bermula 1 Januari 2019, di bawah Peraturan-Peraturan Kawalan Hasil Tembakau (Pindaan) 2018, semua tempat makan sama ada berhawa dingin atau tidak, adalah diwartakan sebagai **Tempat Dilarang Merokok**. Pindaan pewartaan tempat makan ini dibuat di bawah Peraturan 11, Peraturan-Peraturan Kawalan Hasil Tembakau (PPKHT 2004) adalah bertujuan untuk melindungi orang awam terutama golongan bukan perokok daripada terdedah kepada bahaya asap rokok. Ia juga selaras dengan komitmen Malaysia kepada Artikel 8, World Health Organization (WHO) *Framework Convention on Tobacco Control* (FCTC). Selain daripada itu, ia juga bertujuan untuk membudayakan amalan tidak merokok dalam kalangan masyarakat Malaysia dengan menghadkan kawasan yang dibenarkan merokok terutama di kawasan tumpuan orang awam.

Bagi maksud pindaan pewartaan ini, orang ramai adalah diminta untuk tidak merokok di semua tempat makan sama ada berhawa dingin dan tidak berhawa dingin. Ini termasuklah di dalam dan luar bangunan kawasan kedai makan, restoran dan juga medan selera. Larangan ini juga meliputi semua gerai-gerai makan dan kenderaan bergerak yang menyediakan kemudahan meja dan kerusi untuk makan dan minum serta semua restoran yang berada di atas kapal dan keretapi.

Semua pemilik, pengusaha atau tuan punya permis atau kenderaan bergerak atau kenderaan seperti yang disebutkan di atas perlu memastikan tanda larangan merokok yang jelas (seperti di Lampiran) diletakkan di tempat yang boleh dilihat dan mengambil langkah-langkah bagi memastikan tiada orang yang merokok dengan tidak menyediakan kemudahan untuk merokok seperti bekas abu rokok dan sebagainya.

Di bawah Peraturan 11, Peraturan-Peraturan Kawalan Hasil Tembakau 2004 mana-mana individu yang melakukan kesalahan merokok di tempat larangan boleh dikenakan denda tidak melebihi RM 10,000 atau penjara tidak melebihi dua (2) tahun. Manakala di bawah Peraturan 12, Peraturan-Peraturan Kawalan Hasil Tembakau 2004, semua pemilik, pengusaha atau tuan punya permis atau kenderaan yang gagal mempamerkan tanda larangan merokok yang jelas boleh dikenakan tindakan denda tidak melebihi RM 3,000 atau penjara tidak melebihi enam (6) bulan. Bagi kesalahan gagal memastikan tiada orang merokok dan menyediakan kemudahan untuk merokok boleh dikenakan denda tidak melebihi RM 5,000 atau penjara tidak melebihi satu (1) tahun.

Pihak Kementerian Kesihatan Malaysia memohon kerjasama dan komitmen semua lapisan masyarakat agar memainkan peranan sewajarnya bagi memastikan Peraturan ini dipatuhi. Pihak Kementerian Kesihatan Malaysia sentiasa komited bagi memastikan orang awam terutama kanak-kanak, wanita mengandung dan orang tua sentiasa dilindungi daripada bahaya asap rokok dan produk merokok yang lain.

DATUK DR. NOOR HISHAM BIN ABDULLAH
KETUA PENGARAH KESIHATAN MALAYSIA

31 DISEMBER 2018



Bahan

- Apa- apa bahan keras, tegap dan tahan lama

Saiz:

- a) Di dalam mana- mana bangunan atau premis
50cm (tinggi) x 40cm (lebar)
- b) Di dalam mana- mana kenderaan awam
18cm (tinggi) x 15cm (lebar)
- c) Di dalam mana-mana teksis
10cm (tinggi) x 8 cm (lebar)
- d) Di laluan masuk mana- mana tempat
90cm (tinggi) x 60cm (lebar)



Suatu bulatan tebal dan tanda palang tebal berwarna merah yang menindih rokok berwarna hitam yang dinyalakan hendaklah digunakan sebagai ilustrasi pada papan tanda. Papan tanda itu hendaklah mempunyai latar belakang berwarna putih. Pesanan "DILARANG MEROKOK" hendaklah ditulis pada papan tanda itu. Huruf pesanan hendaklah berwarna hitam dan jenis huruf ialah Arial.